

grupe sa prtljagom i opremom klasičnih ovovremenskih putnika, globtrotera, radoznalaca, turista, zaljubljenih u sve ljepote neobičnog i nepoznatog svijeta.

Dolazak Huana Antonija Samarana, predsjednika Međunarodnog olimpijskog komiteta u Sarajevo (29. januar 1984) samo je na ovaj ili onaj način razbuktao svjetsku radoznalost za olimpijsko Sarajevo.

Na sarajevskom aerodromu Samaran je domaćoj Radio-televiziji rekao ovo:

- „...*Drago mi je da sam opet u Sarajevu. Ovoga puta sam došao na ono pravo. Od samog početka smo pratili sve pripreme i svjesni smo da ste učinili veliki napor, ne samo Sarajevo nego i cijela zemlja. Mislim da ste zaslužili da postignete veliki uspjeh na ovim olimpijskim igrama. Želim da, kada budem odlazio, kažem da sam prisustvovao najboljim igrama u istoriji. Biće to jedna velika manifestacija sporta i mladosti sa učesnicima iz 50 zemalja...*”

Istog dana čelni čovjek svjetskog olimpijskog pokreta posjetio je Olimpijsko selo u Mojmilu. Uz zvuke olimpijske himne podigao je olimpijsku zastavu na centralni jarbol Sela. Tako je ovo olimpijsko naselje oficijelno promovisano, uz učešće većeg broja do juče pristiglih stanovnika – sportista iz raznih zemalja i drugih zvaničnih gostiju.

Za opis ljudske šarolikosti ovog neobičnog i lijepog naselja više je od pukog fakta detalj da je prilikom prve ceremonije u komercijalnom kontingentu od 126 inostranih dnevnika i revijalnih listova, naprosto za tren razgrabljeno 47 edicija iz Njemačke, 25 iz Italije, 15 iz Velike Britanije, 14 iz Francuske, 11 iz Austrije, pet iz Švajcarske, po tri iz SAD, Holandije i Španije...

U FAZI ZRELOSTI

Sarajevo, očigledno, konačno ulazi u fazu svoje pune organizatorske zrelosti – spremno sada da precizno, gotovo rutinerski dograđuje i, ako treba, dopunjuje organizaciju Igara novim detaljima.

Veoma racionalno, generalnom vježbom „Sarajevo '84” (28-29. januar 1984), recimo, provjeravan je stepen bezbjednosti u ukupnom programu organizacije XIV ZOI, imajući u vidu ranija dramatična, pa i tragična iskustva nekih prethodnih ljetnih i zimskih igara. Praktično, u vježbu su uključeni svi građani Sarajeva kroz raznolike oblike i strukture života (samozaštita, aktivnost i organizovanost mjesnih zajednica, policija, saobraćaj, ugostiteljstvo, gradske službe i dr). S ponosom je potom konstatovano da prethodni naponi i programi nisu bili uzaludni – vježba je pokazala da Sarajevo zrelo i odgovorno dočekuje skoro veliku olimpijsku manifestaciju.

Igman – Malo polje: Juče (29. januar) dovršeno je uređenje dijelova doskočišta skakaonica. Holandska firma „Filips” instalirala je na vrhunski način na